



— 100 Johr Burgergmaind —

Dr Daag vo de-n-offene Dire
und de zimpftig waiche Bire!!

Friehner no — im alte Basel
Dasch nit numme Biertisch-Gfaasel
Hett e Zunft Bidyttig ghaa
fir ejede Basler-Maa.
Statt aifach numme Wälle g'macht
hett-me-n-uff de Muure g'wacht.
Als Burger mit dym stolze Brueff
hesch nit verpasst dr Zinftler-Rueff.
Als Sattler oder Lädergärber
als Fischer oder flingge Färger
als Münzer oder Kannegiesser —
hitt sehsch nur no Mäppli-Spiesser!
Wo 's Basler Bruuchtum dien vergässe —
si dängge nur ans gratis Frässe.
Hau's nur emool go stimme
no sehsch die Brieder nimme!
Dr Erscht Auguscht?: E faade Gnuss!
dä fyrt me by de Schwoobe-n-uss
oder hoggt in Ensisheim
und fahrt mit-erne Knippel haim.
Und denn erscht d'Sanggt-Jokebsfyrr???
äxistiert nur uff Babyyr!
D'Helde und d'Helvetia
luegen-aim verlasse-n-aa.
E Daggel drillt e-n-Ehre-Runde
no wotter noh ans Dänggmool pfunde.
Wo blybe denn die Zinftler-Manne?
Wo dr Harscht — wie friehner amme?
Im Mobilhaim — am Bielersee
kasch sy d'Ränze blangge seh!
Wo sin all' die Stube-Knächte??
und luege an so Fescht zem Rächtel!
Vom «Säggser» isch au niemerts doo —
so ka's doch nimme wytergoh!

Duet d'Burgergmaind ain uuse losse
sehsch' uff aimool d'Zunftgenosse:
's ganz Karsumbbel stoht uff Degg:
Oberknächt — Pasteetebegg.
Dr Schöllkropf froggt dr Meier bider:
«Hesch au alli Guetschyn by'Dr???»
Dr CH-Karli in sym Suff
spart em Cron dr Bhaltis uff —
Alles suecht dr G.A. Wanner:
dä hett nämligg alli Banner!
Oh! — isch das e Zinftler-Wält:
Dä segglet fir sy Zyyle-Gäld!
Dr Eymaa hett e Kappe-n-aa
und reedet alli Hauchdeutsch aa!
D'Aisse Christ duet brumme:
«Wär hoggt uff mynere Drummle??»
Dr Bruggner grieggt e fallend Weh'
(dr Stääegegruess hett är nimm gseh).

's gwehnlig Volgg stoht an de-n-Egge:
verdruggt sy Wurscht mit Brot — pardon: Wegge!
E Räntner schreyt: «Y ha-n-e Vreeneli»
no hueschtet är e weeneli
dennt kunnt im groosse Booge
sy Goldzahn uuse-gflooge!
Fir 's Näscht under de Basler Brugge
sammet e Fixer alli Gugge!

In de Baize sufft me wyter
dr Schnider bschstellt au no-n-e Lyter
zahle duet dr elter Schnyder
(är dunggt mi glych e bitzli gschyyder).
's kemme neyi Fläsche-n-aane
fir d'Eehrige vo Veteraane.

Die kenne's nit verstooch
wie's mit de Zinft sott wytergoh.
Bächer und Täller uss altem Zinn
hän nit soone sinnige Sinn
's lauft doch als wie myser —
wäge de verschuttete Hyyser!!!
Was nitze Säbel, Hellebarde, Harnisch
wenn 's Zinftler-Huus in fremde Händ' isch?
Ihr hänn doch waichi Bire —
nit nur by offene Dire!!

E neye Zunft-Stammbaum kasch uff dr Ladärne bschauel!
Am Beschte in dr Ladärne-Usstellig in dr Muschtermäss —
Si isch offen vo Morgen am Nyni bis z'Oben am Elfi —
am Zyschtig und erscht no am Mittwuch am Morgen von
Nyni bis am Elfi!
